

Atque hæc ex varijs Hispaniæ scriptoribus excerptimus, ad quæ & alia longè maior felicitas accedit, quàm Vaseus in Hispaniæ Chronico ita cōmemorat. Stat abundans diuitijs & delicijs nobili præcinctæ chlamyde Hispalis, patronis infinitis suffulta gloriosis, sub cuius alis & pallio hi sancti pugiles & bellatores inclyti pausare elegerunt, vsque ad consummationem seculi, qui hanc urbem nocte dieque munimine iugi non deserunt, ac in conspectu Domini pro eius salute, sine intermissione precantur. Hi sunt S. Carpophorus & Abundius, S. Petrus, S. Florentinus, S. Iusta & Rufina virgines, partim sub ipso Daciano, partim sub Diogeniano Daciani Legato. Corpus B. Iustæ ex altissimo puteo in quem proiectum erat, & ossa B. Rufinæ, cuius corpus in amphitheatro combustum fuerat, à venerabili Sabino Episcopo, in cœmeterio suburbij Hispalensis sepulta fuerunt.

Denique ut præstantes arbores boni commendant fructus, ita insigne ornamentum urbibus conferre solent heroici viri, eruditione, rebus magnificè gestis, & virtutibus præstantes. Sic inter alios multos insignes viros, quorum celebris est apud Scriptores mentio, qui Hispalim ortu condecorarunt, nostro æuo extitit **Benedictus Arias Montanus**, Nobilissimus & summus Theologus, plurimarum linguarum vulgarium & eruditæ cognitione admirandus, & homo planè incomparabilis, fecundum & locuples diuino munere ingenium. Testantur id opera quæ summam eius admirationem apud omnes excitant, Inter quæ primas sibi meritò vendicat Veteris ac noui Testamenti ad Græcam, Hebraicam, Chaldaicam, & Syriacam linguam translatio, Deinde Commentariorum opus in duodecim Prophetas, & in reliquos maiores paraphrasis, Liber Generationis & Regenerationis Adam, siue de Historia generis humani, Opus de optimo imperio, siue in lib. Iosue Commentarium, Dauidis Regis ac Prophetæ, aliorumque psalmos ex Hebraica veritate in Latinum carmen conuertit, Hymnos scripsit & secula vario carminum genere. Dictatum Christianum, siue communes & aptas omnium discipulorum Christi partes: Quatuor diuersorum poematum tomos. Atque hæc quidem tanti viri opera ad meam Bibliothecam venerunt, sic plura, quæ non vidi, recensere nequeo.

Non hic longa oratione commemorabo, quàm capax & ampla nauium statio; quanta Batis amœnitas, quàm longè aqua ductus se extendant, quantas opes Hispalenses ex nouo orbe annua nauigatione percipiant, quanto sumptu & apparatu classis Regia hic adornetur, quàm præciosæ merces quàm variæ & exoticæ res ex vniuersa India, Bresilia, Aethiopia, Arabia, Africa, in hanc urbem singulis annis inferantur. Sed Hispalim tantam egredientes agrum vicinum contemplantur. In quo, mirum dictu, quàm excellentia antiquitatum monumenta ex terræ visceribus eruantur, ut peculiari tabula hoc opere explicauimus. Suburbani verò soli vberitas maxima, in quo villæ, horti, cultu & aspectu gratissimi, & amœnissima oliueta conspiciuntur, In quibus condensæ arbores, ardentiori meridiano sole, umbram, secessus, & recreationis occasionem præbent.

In vicino vrbi agro Domus amplissima visitur, El Mattadero nuncupata, in qua optima politiæ ratione mantantur oues & boues, & varia pecora campi, quorum carnes Hispali ciuibus & inquilinis diuenduntur. In latissimo verò campo, iuxta hanc domum, iucundissimum spectaculum præbet, Taurorum venatio, quos robustissimos ibi saginant, capitis ac pectoris robore præstantes, in quos molossos & magnos incitant canes, quibus, per se alioqui feroces, truces actoruos, priusquàm eos mactent, efferare solent, ita ut in canes magna ferocitate insistentes, ignem naribus spirent, terramque pedibus feriant, in altum spargant arenam, frontem semper canibus offerant, & cornibus hostes infestent, & tanto impetu appetant, ut eos cornibus ferientes in aërem altè proijciant, & in cornuum cuspidibus excipiant decedentes.

Denique tam multa de hac vrbe præclara commemorari possunt, ut natum sit inde & tritum vetustate dictum, **Qui non ha visto SEVILLA: non ha visto marauilla.**

Scribit Fortalitium fidei, quod Fernandus Secundus eius nominis, octauus Rex Castellæ, considerans, quod ciuitas Hispalensis, erat de principalibus mundi, quia receptaculum terræ & maris, itaque magno desiderio illam Christianis restitutam cupiuit. Vocato ergo Raymundo Bonifacio, tunc Admiralio, classem per mare adornari mandauit contra Hispalenses, Rex verò per terram cum magnò exercitu venit, Et sic terra & mari, arctissimè obfessa est ciuitas, per menses xvi. Et tandem profligatis Saracenis, Anno millesimo ducentesimo nonagesimo in die Sancti Clementis, occupata, cum multis alijs Hispaniæ ciuitatibus vicinis. Aliam, & vberiore Hispaniæ de-

scriptionem studiosus lector in Indice operis inueniet.